

Ekwo-ozì,  
 Jiemusu  
 Deru

<sup>1</sup> Mube Jiemusu, onye bu onye-ozì Chileke; buru onye-ozì Nnajiuphu, bu Jizosu Kéreshi l'ekele okpa-ipfu iri l'èbo ono, dzuru mgboko ono ekele.

*Ekweta waa mmamiphe*

<sup>2</sup> Unwunna mu; teke iphe-ohutama g'ò dūhabe byaru unu; unu wojeru iya dobe l'iphe, eeteru eswa. <sup>3</sup> Kèle unu maru l'a -nòdu adale ekweta unu bẹ unu e-shi iya nwuta ota-nshi. <sup>4</sup> Unu takpòepho nshi tafu iya l'ishi g'unu adubebe ree; dzukwaphò oke g'ò tò dū iphe, a-phòdu l'èhu unu. <sup>5</sup> Teke o duru g'unu ha onye mmamiphe phòduru; g'onye ono sū Chileke g'ò nū iya mmamiphe. Oo-nū iya ya; eshinu Chileke bu omeluko; teme o nòdu egudeje obu ìphóró nū onyemonye iphe, o sūru g'ò nū iya. <sup>6</sup> Oke g'onye ono kwetakwa l'iphe oopfụ gẹ Chileke nū iya bẹ oo-nū iya. G'ò bọ bọkwa obu èbo; l'onye obu abọ èbo dukwa g'akpara-mini eze-ènyimu, bu pherephere anòduje enwunga iya. O -kwaru iya shia ophu; o kwaru iya shia ophu. <sup>7</sup> G'egube onye ono ta ariekwa l'ò duru iphe, oo-nata l'èka Nnajiuphu; <sup>8</sup> kèle onye abọ egomunggo èbo ta apfushijekwa ike l'iphemiphe, oomekpòo ememe.

Ukpa waa enweru iphe

<sup>9</sup> Gẹ nwanna, daru ukpa tua onwiya epha lẹ Chileke kuliru iya eli. <sup>10</sup> Nokwaphò g'onye ophu nweru iphe e-tu onwiya epha l'ènya lwaru iya; kèle oo-mechaa rifu g'okoko eswa; <sup>11</sup> kèle enyanwu awajẹ chishiahaa

ike k'ophu oomeje ɛswa anwua lwa; okoko iya erishihu; mma iya abvu. Noo g'onye nweru iphe agbabuhukwapho nwuhu l'eka oome iphe, du iya mkpa.

### Ahuta ama waa enwu eye

<sup>12</sup> Ehu-utso be a goru nu onye taru nshi l'ohutama; kele teke a hucharu iya ama obu; ophu o daduru be ee-kpube iya okpu-eze, bu iya bu ndzu; buru obunggo, Chileke suru le ya e-bu ndu yeru iya obu. <sup>13</sup> Oo ya bu; onye aahu ama g'o mee ejo-iphe; o -wata iya agugu; g'o to sukwa l'oo Chileke enwu iya eye g'o mee ya. Kele o to dukwa onye Chileke enwuje eye g'o mee ejo-iphe; ophu o dukwa onye enwu Chileke eye g'o mee ejo-iphe. <sup>14</sup> Oo eme ejo-iphe, agu nemadzu be edetaje iya nu; l'o nmalahu iya. <sup>15</sup> Oo ya bu; teke egu ejo-iphe tsutaru ime; l'onwua iphe-eji; iphe-eji kagheepho; l'onwua anwuhu.

<sup>16</sup> Unwunna mu, mu yeru obu; unu te etsoswekwa uzo. <sup>17</sup> Iphe, aanu anunu, du ree waa iphe-oma, adudu eka ntucha du iya shikota l'imigwe. O shi l'eka Nna ke iphoro imigwe, bu iya bu Nna ophu te echibuhujedu g'enyanwu abujeru o -chibuhu; ochi agbaahaa-a. <sup>18</sup> O turu obu iya onyo gude okpobe-opfu ono nwua anyi; g'anyi du g'akpuru iphe-mbu l'iphemiphe, o meru ememe.

### Anuma emee

<sup>19</sup> Unwunna mu, mu yeru obu; iphe, unu a-maru bu owa-a: g'onnyemonye bukwaru onye angabeje nchi l'iphe, eepfu temanu ooyee ya onu; buru onye ehu te eghujedu eghu egwegwa; <sup>20</sup> kele iphe, eeme l'ehu-eghu taa bukwaru iphe, pfuru oto l'iphu Chileke. <sup>21</sup> Oo ya bu; unu tofu onwunu iphe, bukpuo umere, l'eshi ishi; waa

iphe, bukpo iphe-ashi; jia obu oyi; nata opfu ono, a kuru l'ime okpoma unu ono, bu iya l'a-du ike dzoo unu ono.

<sup>22</sup> Ole-a; unu bukwaru ndu eme opfu ono ememe. Unu ta abukwaru ndu anu iya anunu kpurumu; kele ono bukwa eme onwunu eswe. <sup>23</sup> Onye anupho opfu ono anunu; ophu oomedu iya ememe yeru nwoke, ele g'iphu gbaru iya l'onyo. <sup>24</sup> Mbu onye lechaekwadurupho enya l'onyo bya atugbua bya azohaehukwapho g'iphu gbaru iya. <sup>25</sup> Obenu onye enyoje ekemu ono, adudu aka ntucha du iya; mbu ekemu, emeje g'e nweru onwonye ono; o -duru onye phuberu iya iphu; ophu o budu onuma-ozohaa; o -buru onye emeje iya ememe; onye ono be eegude iphe, oome meeru eze-iphe-oma.

<sup>26</sup> Onye dobesu le ya bu onye ke Chileke l'ebe abu l'oosedeye ire iya eme onwiya eswe. Onye ono be eme ke Chileke nkiya bu ke mmanu. <sup>27</sup> Abu onye ke Chileke ophu Chileke, bu Nna kweru l'o bu okpobe iya bya aburu ophu ntucha adudu ono be bu akwo unwoogbee le mkpa, duru phe nu; waa eyeru unwanyi, ji phe anohedu aka; waa ewofu aka le mkparwu ke mgboko-a.

## 2

*Anma* okwa abo nemadzu ebo

<sup>1</sup> Unwunna mu; g'unube ndu kweru ke Nnajiuphu anyi, bu Jizosu Kereshi-a; mbu Nnaji akpabiri; unu ta abojekwa nemadzu ebo. <sup>2</sup> Kele-a; o -buru l'onye nweru iphe gbacharu mgbuguru bya akwaa onwiya yegele bataru l'ulo-nduko unu; onye ukpa -yee nwankiriba iphe batakwapho; <sup>3</sup> teke unu kwaberu onye pho, kwaru akwapho ubvu su iya: "Bya asugabe onwongu l'okposhi-echi-a" bya asu onye ukpa pho: "Pfururu l'eka ono" ozoo: "Bya anodu l'ali l'eka-a no-kube mu"; <sup>4</sup> to budu

nemadzū bẹ unu abọ ẹbo ẹgube ono; tẹme unu gude ẹjo egomunggo ekpe ikpe?

<sup>5</sup> Unu ngabẹkpodapho nchi; unwunna mu, mu yeru obu. ?Tọ budu ndu ukpa ẹ mgboko-a bẹ Chileke hotaru g'ẹphe buru ndu shi l'ekweta, ẹphe kwetarū nweru iphe l'iphu Chileke; bukwarupho ndu e-nweru ẹka ọ bu eze, bu iphe, ọ sūru ẹ ya a-nū ndu yeru iya obu-a. <sup>6</sup> Unu gbenu meru iphe-iphere kpua ndu ukpa ?Tọbudu ndu nweru iphe bẹ l'akpajẹ unu ẹhu-a? ?Tọ budu phẹ bẹ l'akpujeru unu je edobe l'ulo ndu-ikpe-a? <sup>7</sup> ?Tọbudu phẹ anọduje epfubiyi ẹguru ẹpha ono, unu aza ono epfubiyi-a?

<sup>8</sup> Unu -nọdu emewaa eze ekemu ono bẹ unu emewaa ree, bu iya bu eze ekemu, nọ l'ẹkwo Opfu Chileke, sūru: “G'i yee nemadzū ibe ngu obu g'i yeru onwongu.”

<sup>9</sup> Obenu ẹ-a; unu -nọdu abọje nemadzū ẹbo bẹ unu emekwa iphe-ẹji; tẹme ekemu nọdu anmakwapho unu ikpe, bu iphe, gbaru onye emebyi ekemu. <sup>10</sup> Kẹle onye meẹbekotaru iphe, ekemu pfuru g'ọ ha; mephodo nanu bẹ ikpe nmakwaru l'o mebyikotaru iya g'ọ ha. <sup>11</sup> Kẹle ọ bukwapo onye sūru g'i ti rishi ogori sūru g'i ti gbushi ọchi. Ọ -buru l'i ti ridu ogori; ị nọdu egbu ọchi; ị buakwaa onye emebyi ekemu. <sup>12</sup> Ọo ya bu; unu pfuje; tẹme unu emejkwapho gẹ ndu ee-gude ekemu ono, emeje g'e nweru onwonye ono kpee ikpe. <sup>13</sup> Kẹle onye ta aphuduru onye ọzo obu-imemini bẹ a taa phukwarupho obu-imemini mẹ e -kpeje ikpe. Obu-imemini atujeru okoo kpua ikpe!

*Ekweta yẹle iphe, eeme ememe*

<sup>14</sup> Unwunna mu; ?denu urwu, du ẹ nemadzū sūru ẹ ya nweru ekweta; ophu oogoshidu iya l'umere? Ẹgube ekweta ono ?ọo-du ike dzọo ya? <sup>15</sup> Teke ọ bu l'ọ dūru nwanna kẹ nwoke; ọzoo kẹ nwanyi, gbagbuwa ọto; tẹme

ophu o humajedu nri ria; <sup>16</sup> onye lanu g'unu ha su iya: “Tɔkwa ehu-o! Laa je anyaru oku; g'epho ji ngu” l'ebe abu l'o nuru iya iphe, bu mkpa ehu iya; ?deno urwu, du l'egube iphe ono? <sup>17</sup> Noo g'ekweta kpoloko e te goshiduru l'iphe, eeme ememe bu iphe, nwuhuru anwuhu.

<sup>18</sup> Obenu l'a su mu: “Gubedua nweru ekweta; mbedua nodu ejekwanu ozi.” O du ree; goshiakwa mu ekweta ngu me ii -jedu ozi, du iya nu. Mbedua-a egudekwanu ozi, mu eje goshi ngu ekweta mu. <sup>19</sup> I kweru le Chileke bu Chileke lanu; i meru ree. Ono bukwapho g'obvu kwegbaaru gude iya anmagbaa pyaapyaapya. <sup>20</sup> Ole iphe, imaru gube onye mmanu ono bu l'ekweta, eegoshiduru l'iphe, eme ememe ta abudu okpobe iya. <sup>21</sup> ?Deno g'onyeiche anyi, bu Ebirhamu gude buru onye pfuberekoto l'iphe Chileke? O shi l'iphe, o meru; kele o gude Ayizaku, bu nwa iya je egbugbu ge ya gude gweeru Chileke ngweja l'oru-ngweja. <sup>22</sup> ?Ti humaduru g'ekweta iya yee iphe, o meru dagbaru? Iphe, o meru goshiru l'ekweta iya dzuru edzudzu. <sup>23</sup> Iphe, e deru l'ekwo-opfu Chileke mee g'e pfuru iya; kele o suru: “Ebirhamu kweru ke Chileke; o guaru iya ya l'apfubekoto”; teme o gu ya eguru onya iya. <sup>24</sup> Unu huma l'oo iphe, nemadzu eme be e gude agu iya l'onye pfuberekoto; o to budu-a ekweta kpurumu.

<sup>25</sup> Nokwapho ge nwanyi ovuoba-a, bu Rehabu-a du. Oo iphe, o meru be o gude buru onye pfuberekoto; kele o kweru ge ndu Jiu, e ziru ozi bata ibe iya; bya eyeru phe aka; ephe shia uzo ozo laa.

<sup>26</sup> Kele oo g'anu-ehu, unme adudu nwuhuru anwuhu-a bu g'ekweta, eegoshiduru l'iphe, eeme ememe nwuhuru.

## 3

*Ire bu ugu*

<sup>1</sup> Ụnwunna mu; unu ta adụkwa igwe buru ndu ezije iphe; kele unu maru l'anyi be ndu ezije iphe be Chileke a-ka ekpeshi ikpe ike. <sup>2</sup> G'anyi ha etsosweje iphe, du igwerigwe. O kwa onye opfu teke edeswe bu onye dubebe ree. O buru egube onye ono adujekwapho ike sede onwiya. <sup>3</sup> Anyi -woru mkpurukpu-igwe-inya kobe inya l'onu g'o meje iphe, anyi suru g'o mee be anyi emeje inya l'ophu; l'ooshi eka anyi suru g'o shia. <sup>4</sup> Ozokwapho ugbo-mini; ?I humaru g'o habe shii; teme o buru oke pherephere anoduje akpo iya; ole oo nwa gberere eku ugbo be eegudeje anga iya l'ooshi iphe, bukpo eka onye-ishi ugbo anga iya eshi. <sup>5</sup> Nokwapho g'ire bu nwiphe nshii; ole ootuje onwiya epha le ya erenka ire.

?Ti humaduru g'oswa habe shii? ole akpuru oku lanu etsuje obote-egu. <sup>6</sup> Su-a; ire bu akpuru oku. Ire no-chiru enya iphe, bukpo ejo-iphe, no le mgboko-a l'ehu anyi. Ire epfurwuje ogwehu nemadzu mgburugburu; teme o nodu alotaje oku-ali-maa tsobe le ndzu nemadzu; l'ootsua ya tsufu; ooshipho teke a nwuru onye ono; tsua jasụ g'oo-no-beru. <sup>7</sup> O to dudu egube anu-egbudu; ozoo enu; ozoo iphe, akpu akpukpu; ozoo iphe, bu le mini, nemadzu ata agotajedu agota; l'ooburu l'unuphu; ophu o dudu ophu a gotaadaru; o buru l'unuphu. <sup>8</sup> Obenu l'ire ta adudu amadu suru iya agota; o bu ejo-iphe, e te gudeshijedu egudeshi. O du g'eru ejo agwo, te edodu onye o taru edodo. <sup>9</sup> O bu iya be anyi gude aja onye ono, bu Nna bya buru Nnajiuphu ono; ole o buhukwa iya pho be anyi gude atu nwibe anyi onu; mbukwa onye e meru; o du ge Chileke. <sup>10</sup> O buru onu lanu ono be ago onu ye atu onu shi. Ụnwunna mu; o to gbaduru g'o du egube ono. <sup>11</sup> O to dudu nggele, asofutaje mini, atsọ ilu bya asofutajekwapho mini, atsọ utso mgbo lanu. <sup>12</sup> Ụnwunna mu! Oshi figu ta

amijekwa akpuru olivu. Ophu vayinu amijekwa akpuru figu. Nokwapho g'e te ekutadu mini, atsō uto l'umaswi.

*Mmamiphe, shi l'igwe*

<sup>13</sup> ?O duru onye ari le ya maru iphe; nweru uche g'unu ha? Onye ono goshieshikwa iya l'eme umere oma; waa l'eme gelee ophu shi le mmamiphe. <sup>14</sup> Teke o bukwanu l'unu eji iji-anya, atsō-ilu bya aburu ndu akpa anya; unu te ejekwa etu onwunu epha ke mmamiphe ono; kele o oka be unu gude emebiyi okpobe-opfu. <sup>15</sup> Egube mmamiphe ono te eshikwa l'igwe. O shi l'eka ndiphe. O to shidu l'eka Unme Chileke. O shi l'eka Nsetanu. <sup>16</sup> Kele eka iji-anya yee akpa anya du be mkpaka dukwapho; ophu o dudu egube ejo-iphe, adudu iya nu. <sup>17</sup> Obenu le mmamiphe ophu shi l'igwe dube ree; bya aburu nchi-adu-doo; bya eme gelee; bya eme onu-uto; bya aphu obu-imemini; bya ami okpobe mebyi; ophu okpochadu mkpocha; ophu o budu tuko l'ehu-atuko-l'obu. <sup>18</sup> Teme mebyi, ndu eme ge nchi du doo amije bu apfubekoto.

4

*Eshita ndiphe onya*

<sup>1</sup> ?Bu awe be abaphe mba yee esephe opfu ono shigbaa unu? ?Tobudu eka o shigbaa unu bu l'iphe, ekpiri iya du unu? ?Tobudu iya bu iphe, bu ugu, du l'ehu unu? <sup>2</sup> Obujeru iphe, agu unu erwuduru unu eka; unu egude k'iphe ono gbua haru ochi. Unu -chabe anya l'iphe onye ozo; ophu o dudu; unu abaaha mba; seaha opfu. Unu ta ahumaduru uzo iphe, agu unu; kele unu ta asuduru g'a nu iya unu. <sup>3</sup> Unu nodu asuje g'a nu unu iphe; a ta ndu iya unu; opfu l'unu egudeje oriri, adudu ree epfu iya g'ee-shi g'unu egude iya mee iphe, agu unu ugu. <sup>4</sup> Unube unwanyi me unwoke, eri ogori ono; ? unu ta amadu

l'onye yēe iphe-utso, dū lē mgboko-a eshi ònyà bụwaa onye ọhogu Chileke? Ọo ya bụ l'ọ tọ dudu m'obeta ọ bụru onye dū idagha hatarū g'ēphe lē ndiphe shiru ònyà; onye ono emekwa onwiya onye ọhogu Chileke. <sup>5</sup> Tọ ?ọ dū unu g'iphe, e deru l'ekwo-opfu Chileke bụ kē mmanū, sūru lē “Chileke eko okophoo unme ono, o yeru g'o buru l'ime anyi ono?” <sup>6</sup> Ọle eze-iphe-oma kē Chileke ka shii. Noo iphe, e deru l'ekwo-opfu Chileke sū: “Chileke apfuchijekwa ndu nggangga ụzo. Ọ nọdu emejeru eze-iphe-oma nū ndu wozeru onwophe alị.”

<sup>7</sup> Ọo ya bụ; unu nọdu Chileke l'eka. Unu apfu-chia Obutuswe ụzo; hūma l'ọo-gbaru unu ọso. <sup>8</sup> Unu kpīritaru Chileke ntse; hūma l'ọo-kpīritakwarupho unu ntse. Unu kwọo onwunu eka unubē ndu eme iphe-ēji. Unu sachaa obu unu ree unubē ndu abọ obu ēbo. <sup>9</sup> G'o rwua unu l'ēhu; g'aphū ji unu obu; unu kwashia enya-mini. G'achị ọchi bụru unu aphū; g'emereme bụru unu iphere. <sup>10</sup> Unu wozeje onwunu alị l'iphu Chileke g'ookulia unu eli.

*Anma* ọkwa epfurwushi nwanna onye

<sup>11</sup> Ụnwunna mu; unu te epfurwushijekwa nwibe unu. Onye epfurwushi nwanna iya; ọzoo onye anma nwanna iya ikpe bē epfubyikwa ekemu; tēme ọ bụru ekemu bē ọ gbē ekpe ikpe. Obenu lē teke iikpe ekemu ikpe bē i ti meekwa iphe, ekemu pfuru. Ọ kwa onye-ikpe bē ì bụ. <sup>12</sup> Onye lanū kpūrumu bụ onye atūje ekemu; tēme ọ bụru iya bụ onye-ikpe; mbū onye ono, adūje ike dzọo ndzū; dūkwapho ike gbua nemadzū. Obenu ?bū onye b'i dobesu l'ì bụ gūbe onye ono, anma nwibe ngu ikpe?

*Anma* ọkwa etu onwonye epha

<sup>13</sup> Unu ngaberu mu nchị; unubē ndu sūru “Ntanū-a; ọzoo echele bē ọ dūru mkpūkpu, anyi e-je je anogba apha; gbaa nghọ rita urwu;” <sup>14</sup> l'ēbe abū l'unu maru



g'echele a-du. ?Ndzụ unu bụ gụnu? O bụ ẹnwuru-ọku, akpụ-lihuje; a nọkwapho nwanshị l'oophukashihu. <sup>15</sup> Noo iphe, unu gege asuje-chia: “Ọ -dụ Chileke l'uche bẹ anyi a-tụko nọdu ndzụ; mee ọwa-a; ọzoo ophuu.” <sup>16</sup> Obe l'ọwa bẹ unu etse etsetse bya etu onwunu ẹpha. Ẹgube ekuku ono g'ọ hakọta duka ẹji.

<sup>17</sup> Ọo ya bụ l'onye maru ree, o gege eme; ophu o meduru iya bẹ ọ bukwa onye obu eme iphe-ẹji.

## 5

### *Anmaru ndu nweru iphe ọkwa*

<sup>1</sup> Nta-a bụ k'unubẹ ndu nweru iphe; unu kwashia ẹnya-mini; chia mkpu ẹjo-aphụ, abyaru unu. <sup>2</sup> Ẹku unu reshihuचाakwaru ereshihu. Teme ńgwá unu buru iphe, nsụ sukashichawaru. <sup>3</sup> Mkpọla-ododo unu mẹ kẹ mkpọla-ọchaa unu gbaakwaru ẹgba. Ọo ẹgba iya ono a-pfuru agba unu ekebe. Oo-kepyashi anụ-ẹhu unu g'ọku. Nta-a bẹ unu kparụ ẹku kuberu onwunu l'ikpazua. <sup>4</sup> Ndu jeru unu ozi ẹgu bẹ unu ta apfuduru ugwo; aphụ, ẹphe agụ bẹ erwuakwa l'igwe. Teme mkpu kẹ ndu kpatarụ unu iphe, unu kọru l'opfu rwuakwapho nchị Chipfu, bụ Ọkalibe-Kakọta-ike ono. <sup>5</sup> Unu buru lẹ mgboko; túsaru ẹhu; eri gwogwoo; eme ẹhu unu ẹhu unu. Unu tsua onwunu ẹbà g'anụ-ẹbà kwabẹru mbọku egbugbu unu. <sup>6</sup> Unu nmarụ ndu pfuberekoto ikpe; gbua phe; l'ẹbe abụ l'ọ duru iphe, ẹphe akpọshijehawaa unu ememe.

### *Ata nshi waa epfu anụ Chileke*

<sup>7</sup> Ụnwunna mu; unu takpọkwapho nshi nọdu jasu teke Nnajiuphu a-bya. Unu hụmaru g'onye kọru opfu ataje nshi; kwabẹru opfu iya g'o rwuta iphe, barụ urwu. Ọotaje nshi; igwe eshi l'awuze dzee mini dzekọta iya

udzumini; l'ootaa nshi jasū l'ephefuta. <sup>8</sup> Unubēdua kwaphō; unu takwaphō nshi; shihu obu ike; kēle teke Nnajiuphu a-bya dūakwaa ntse.

<sup>9</sup> Unwunna mu; unu ta agujekwaru nwibe unu aphū g'eete ekpedu unu ikpe. Unu lekwa onye-ikpe g'ōopfuru l'ōnu mgbo! <sup>10</sup> Unwunna mu; unu nyatajekpoepho ndu shi epfuchijeru Nnajiuphu. Unu gudeje phē nwūa ōta-nshi teke unu eje iphe-ēhuka. <sup>11</sup> Unu eleanaa; ō kwa ndu tarū nshi bē anyi ekuje ndu a gōru ēhu-ūtso nū. Unu nūmawaru atanshi kē Jiobu. Unu makwaruphō iphe, Nnajiuphu nūru iya l'ikpazū. Kēle Nnajiuphu bū onye obu-imemini bya abūru ō-gba-mkpu.

<sup>12</sup> Ōle ōphu kachakpōonu; unwunna mu bū; unu te erijekwa angū. Unu te egudejekwa igwe ōzoo alī ria angū; ōphu ō dūkwa iphe ōzo unu e-gudeje ria angū. Unu - sū “ee” g'ō būru ee; teke unu sūru “waawaa” g'ō būru waawaa; g'a ta anma unu ikpe iya.

<sup>13</sup> ?Ō dūru g'unu ha onye eje iphe-ēhuka? G'onye ono pfuru nū Chileke. ?Ō dūru onye ēhu atso? G'onye ono gūa ebvu ajaja! <sup>14</sup> ?Ō dūru g'unu ha onye iphe eme? G'onye ono kukōo ndu e meru ōgerenya Chiochi g'ēphe pfuru opfu ēhu iya nū Chileke. Ephe egude ēpha Nnajiuphu wūa ya manū l'ishi. <sup>15</sup> Opfu, e pfuru nū Chileke bya ekweta l'oo-mee bē a-dzōta onye iphe eme; Nnajiuphu abya emee; l'o wekōrohu. Teke ō bū l'ōo iphe-ēji bē o meru; a gūaru iya ya nvū. <sup>16</sup> Noo ya bū; unu kōshijeru nwibe unu iphe-ēji unu; tēme unu epfukwaphō anūru nwibe unu Chileke g'ee-me g'unu wekōrohu. Opfu, onye pfūberekoto pfuru nū Chileke bē ike dūkwa l'ere ire.

<sup>17</sup> Elayijia bū nemadzū mmanū g'anyi bū. Ō pfuru nū Chileke pfushia ya ike sū g'igwe buchia mini. Ō nōo mgbarapha ēto l'ōnwa ishii; ōphu mini atadaduru l'alī.

<sup>18</sup> Ọ bya epfuru nụ Chileke ọzo; igwe bya mini. Iphe, a kuru l'alị mịahaa mebyi ọzo.

<sup>19</sup> Ụnwunna mu; ọ -duru g'unu ha onye shisweru ụzo l'Ọkpobe-opfu ono; onye ọzo duphuta iya azụ l'ụzo, pfuru ọto; <sup>20</sup>g'onye ono maru l'onye duphutaru onye eme iphe-ẹji azụ; mbụ onye l'eshi ụzo, gberu nggọ; onye ono bẹ dzọtaru nemadzụ l'ẹka ọnwu; tẹme o meakwaruphọ; a gụaru iya nvụ l'ikpoto iphe-ẹji.

Bayıburu Izii  
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d